

四庫全書

集部

欽定四庫全書

唐宋八大家文鈔卷三十

明 茅坤 撰

廬陵文鈔二

書疏劄子

論臺諫官言事未蒙聽允書

劾去陳執中以好疑自用起眼目以下六七層

委曲打出如川雲如嶺月其出不窮

臣聞自古有天下者莫不欲為治君而常至於亂莫不欲為明主而常至於昏者其故何哉患於好疑而自用也夫疑心動於中則視聽惑於外視聽惑則忠邪不分而是非錯亂忠邪不分而是非錯亂則舉國之臣皆可疑既盡疑其臣則必自用其所見夫以疑惑錯亂之意而自用則多失失則其國之忠臣必以理而爭之爭之不切則人主之意難回爭之切則激其君之怒心而堅其自用之意然後君臣爭勝於是邪佞之臣得以因隙

而人希旨順意以是為非以非為是惟人主之所欲者
從而助之夫為人主者方與其臣爭勝而得順意之人
樂其助已而忘其邪佞也乃與之并力以拒忠臣夫為
人主者拒忠臣而信邪佞天下無不亂人主無不昏也
自古人主之用心非惡忠臣而喜邪佞也非惡治而好
亂也非惡明而欲昏也以其好疑自用而與下爭勝也
使為人主者豁然去其疑心而回其自用之意則邪佞
遠而忠言入忠言入則聰明不惑而萬事得其宜使天

下尊為明主萬世仰為治君豈不臣主俱榮而樂哉與其區區自執而與臣下爭勝用心益勞而事益惑者相去遠矣臣聞書載仲虺稱湯之德曰改過不悛又戒湯曰自用則小成湯古之聖人也不能無過而能改過此其所以為聖也以湯之聰明其所為不至於繆戾矣然仲虺猶戒其自用則自古人主惟能改過而不敢自用然後得為治君明主也臣伏見宰臣陳執中自執政以來不叶人望累有過惡招致人言而執中遷延尚玷宰

府陛下憂勤恭儉仁愛寬慈堯舜之用心也推陛下之
用心天下宜至於治者久矣而紀綱日壞政今日垂國
日益貧民日益困流民滿野濫官滿朝其亦何為而致
此由陛下用相不得其人也近年宰相多以過失因言
者罷去陛下不悟宰相非其人反疑言事者好逐宰相
疑心一生視聽既惑遂成自用之意以謂宰相當由人
主自去不可因言者而罷之故宰相雖有大惡顯過而
屈意以容之彼雖惶恐自欲求去而屈意以留之雖天

災水旱饑民流離死亡道路皆不暇顧而屈意以用之
其故非他直欲沮言事者爾言事者何負於陛下哉使
陛下上不顧天災下不恤人言以天下之事委一不學
無識諂邪狠愎之執中而甘心焉言事者本欲益於陛
下而反損聖德者多矣然而言事者之用心本不圖至
於此也由陛下好疑自用而自損也今陛下用執中之
意益堅言事者攻之愈切陛下方思有以取勝於言事
者而邪佞之臣得以因隙而入必有希合陛下之意者

將曰執中宰相不可以小事遂不可使小臣動搖甚者則誣言事者欲遂執中而引用他人陛下方患言事者上忤聖聰樂聞斯言之順意不復察其邪佞而信之所以拒言事者益峻用執中益堅夫以萬乘之尊與三數言事小臣角必勝之力萬一聖意必不可回而言事者亦當知難而止矣然天下之人與後世之議者謂陛下拒忠言庇愚相以陛下為何如主也前日御史論梁適罪惡陛下赫怒空臺而遂之而今日御史又復敢論宰

相不避雷霆之威不畏權臣之禍此乃至忠之臣也能
忘其身而愛陛下者也陛下嫉之惡之拒之絕之執中
為相使天下水旱流亡公私困竭而又不學無識憎愛
挾情除改差繆取笑中外家私穢惡流聞道路阿意順
旨專事逢君此乃諂上傲下愎戾之臣也陛下愛之重
之不忍去之陛下睿智聰明羣臣善惡無不照見不應
倒置如此直由言事者太切而激成陛下之疑惑爾執
中不知廉耻復出視事此不足論陛下豈忍因執中上

累聖德而使忠臣直士卷舌於明時也臣願陛下廓然
回心釋去疑慮察言事者之忠知執中之過惡悟用人
之非法成湯改過之聖遵仲虺自用之戒盡以御史前
後章疏出付外廷議正執中之過惡罷其政事別用賢
材以康時務以拯斯民以全聖德則天下幸甚臣以身
叨恩遇職在論思意切言狂罪當萬死

論包拯除三司使上書

包拯不能不汗顏心服

臣聞治天下者在知用人之先後而已用人之法各有
所宜軍旅之士先材能朝廷之士先名節軍旅主成功
惟恐其不趨賞而爭利其先材能而後名節者亦勢使
之然也朝廷主教化風俗之薄厚治道之汙隆在乎用
人而教化之於下也不能家至而諄諄諭之故常務尊
名節之士以風動天下而聳勵其媮薄夫所謂名節之
士者知廉耻修禮讓不利於苟得不牽於苟隨而惟義
之所處白刃之威有所不避折枝之易有所不為而惟

義之所守其立於朝廷進退舉止皆可以為天下法也
其人至難得也至可重也故其為士者常貴名節以自
重其身而君人者亦常全名節以養成善士伏見陛下
近除前御史中丞包拯為三司使命下之日中外喧然
以謂朝廷貪拯之材而不為拯惜名節然猶冀拯能執
節守義堅讓以避嫌疑而為朝廷惜事體數日之間遽
聞拯已受命是可惜也亦可嗟也拯性好剛天姿峭直
然素少學問朝廷事體或有不思至如逐其人而代其

位雖初無是心然見得不能思義此皆不足怪若乃嫌疑之迹常人皆知可避而拯豈獨不思哉昨聞拯在臺日常自至中書詬責宰相指陳前三司使張方平過失怒宰相不早罷之既而臺中寮屬相繼論列方平由此罷去而以宋祁代之又聞拯亦曾彈奏宋祁過失自其命出臺中寮屬又交章力言而祁亦因此而罷而拯遂代其任此所謂蹊田奪牛豈得無過而整冠納履當避可疑者也如拯材能資望雖別加進用人豈為嫌其不

可為者惟三司使爾非惟自涉嫌疑其於朝廷所損不
細臣請原其本末而言之國家自數十年來士君子務
以恭謹靜慎為賢及其弊也循默苟且頽惰寬弛習成
風俗不以為非至於百職不修紀綱廢壞時方無事固
未覺其害也一旦元昊犯邊兵出無功而財用空虛公
私困弊盜賊並起天下騷然陛下奮然感悟思革其弊
進用三數大臣銳意於更張矣於此之時始增置諫官
之員以寵用言事之臣俾之舉職由是修紀綱而繩廢

壞遂欲分別賢不肖進退材不材而久弊之俗驟見而
駭因共指言事者而非之或以謂好訐陰私或以為公
相傾陷或謂沽激名譽或謂自圖進取羣言百端幾惑
上聽上賴陛下至聖至明察見諸臣本以忘身殉國非
為已利讒間不入遂荷保全而中外之人久而亦漸為
信自是以來二十年間臺諫之選屢得謹言之士中間
斥去姦邪屏絕權倖拾遺救失不可勝數是則納諫之
善從古所難自陛下臨御以來實為盛德於朝廷補助

之效不為無功今中外習安上下已信纖邪之人凡所
舉動每畏言事之臣時政無巨細亦惟言事官是聽原
其自始開發言路至於今日之成效豈易致哉可不惜
哉夫言人之過似於徼訐逐人之位似於傾陷而言事
之臣得以自明者惟無所利於其間爾而天下之人所
以為信者亦以其無所利焉今極屏逐二臣自居其位
使將來姦佞者得以為說而惑亂主聽今後言事者不
為人信而無以自明是則聖明用諫之功一旦由極而

壞夫有所不取之謂廉有所不為之謂耻近臣舉動人所儀法使極於此時有所不取而不為可以風天下以廉耻之節而極取其所不宜取為其所不宜為豈惟自薄其身亦所以開誘他時言事之臣傾人以覲得相習而成風此之為患豈謂小哉然極所恃者惟以本無心耳夫心者藏於中而人所不見迹者示於外而天下所瞻今極欲自信其不見之心而外掩天下之迹是猶手探其物口云不欲雖欲自信人誰信之此臣所謂嫌疑

之不可不避也况如拯者少有孝行聞於鄉里晚有直
節著在朝廷但其學問不深思慮不熟而處之乖當其
人亦可惜也伏望陛下別選材臣為三司使而處拯他
職置之京師使拯得避嫌疑之迹以解天下之惑而全
拯之名節不勝幸甚臣叨塵侍從職號論思昔嘗親見
朝廷致諫之初甚難今又復見陛下用諫之效已著實
不欲因拯而壞之者為朝廷惜也臣言狂計愚伏俟誅
戮

論選皇子疏

忠悃

臣聞言天下之難言者不敢冀必然之聽知未必聽而不可不言者所以盡為忠之心况臣遭遇聖明容納諫諍言之未必不聽其可默而不言臣伏見自去歲以來羣臣多言皇嗣之事臣亦嘗因災異竊有奏陳雖聖度包容不加誅戮而愚誠懇至天聽未回臣實不勝愛君之心日夜區區未嘗忘此思欲再陳狂瞽而未知所以

為言今者伏見充國公主近已出降臣因竊思人之常道莫親於父子之親人之常情亦莫樂於父子之樂雖在聖哲異於凡倫其為天性於理則一陛下嚮雖未有皇嗣而尚有公主之愛上慰聖顏今既出降漸踈左右則陛下萬幾之暇處深宮之中誰可與語言誰可承顏色臣愚以謂宜因此時出自聖意於宗室之中選材賢可喜者錄以為皇子使其出入左右問安侍膳亦足以慰悅聖情臣考於書史竊見自古帝王雖曰至尊未嘗

獨處也其出而居外也不止百司公見奏事而已必有
儒臣學士講論於閒宴又有左右侍從顧問語言其入
而居內也不止宦官官妾在於左右而已其平居燕寢
也則有太子問安侍膳於朝夕其優游宴樂也多與宗
室子弟懽然相接如家人計其一日之中未嘗一時獨
處也今陛下日御前後殿百司奏事者往往仰瞻天顏
而退其甚幸者得承一二言之德音君臣之情不通上
下之意不接其餘在廷之臣儒學侍從之列未聞一人

從容親近於左右入而居內則至於問安侍膳亦闕於朝夕是則陛下富有四海之廣躬享萬乘之尊居外則無一人可親居內則無一人得親此臣所以區區而欲言也伏況陛下荷祖宗之業承宗廟社稷之重皇子未降儲位久虛羣臣屢言大議未決臣前所奏陳以謂未必立為儲貳而且養為子既可以徐察其賢否亦可以待皇子之降生於今為之亦其時也臣言狂計愚伏俟

斧鉞

水災疏

言人所不敢言亦人所不能見如此奏疏漢唐所

少

臣伏觀近降詔書以雨水為災許中外臣寮上封言事
有以見陛下畏天愛人恐懼修省之意也竊以雨水為
患自古有之然未有水入國門大臣奔走滄浸社稷破
壞都城者此蓋天地之變也至於王城京邑浩如陂湖
衝溺奔逃號呼晝夜人畜死者不知其數其幸而免者

屋宇摧塌無以容身縛棧露居上雨下水壘累老幼狼籍於天街之中又聞城外墳冢亦被浸注棺槨浮出骸骨漂流此皆聞之可傷見之可憫生者既不安其室死者又不得其藏此亦近世水災未有若斯之甚者此外四方奏報無日不來或云閉塞城門或云衝破市邑或云河口決千百步闊或云水頭高三四丈餘道路隔絕田苗蕩盡是則大川小水皆出為災遠方近畿無不被害此陛下所以驚懼莫大之變隱惻至仁之心廣為諮

詢冀以消復竊以天人之際影響不差未有不召而自至之災亦未有已出而無應之變其變既大則其憂亦深臣愚謂非小小有為可以塞此大異也必當思宗廟社稷之重察安危禍福之機追已往之闕失防未萌之患害如此等事不過一二而已自古人君必有儲副所以承宗社之重而不可闕者也陛下臨御三十餘年而儲嗣未立此久闕之典也近聞臣寮多以此事為言大臣亦嘗進議陛下聖意久而未決而庸臣愚士知小忠

而不知大體者因以為異事遂生嫌疑之論此不思之甚也且自古帝王有子至二三十人者甚多材高年長羅列於朝者亦衆然為其君父者莫不皆享無窮之安豈有所嫌而斥其子耶若陛下鄂王豫王皆在至今則儲宮之建久矣世之庸人偶見陛下久無皇子忽聞此議遂以云云爾且禮曰一有元良萬國以正蓋謂定天下之根本上承宗廟之重亦所以絕臣下之邪謀自古儲嗣所以安人主也若果如庸人嫌疑之論則是常無儲嗣則人主安有儲嗣則人主危

此臣所謂不思之甚也臣又見自古帝王建立儲嗣既以承宗廟之重又以為國家美慶之事故每立太子則不敢專享其美必大赦天下凡為人父後者皆被恩澤所以與天下同其慶喜然則非惡事也漢文帝初即位之明年羣臣再三請立太子文帝再三謙讓而後從之當時羣臣不自疑而敢請漢文帝亦不疑其臣有二心者臣主之情通故也五代之主或出武人或出夷狄如後唐明宗尤惡人言太子事羣臣莫敢正言有何澤者嘗上書乞立太子明

宗大怒謂其子從榮曰羣臣欲以汝為太子我將歸老於河東由是臣下更不敢言然而文帝立太子之後享國長久為漢太宗是則何害其為明主也後唐明宗儲嗣不早定而秦王從榮後以舉兵窺覲陷于大禍後唐遂亂此前世之事也况聞臣寮所請但欲擇宗室為皇子爾未即以為儲貳也伏惟陛下仁聖聰明洞鑒今古必謂此事國家大計當重慎而不可輕發所以遲之耳非惡人言而不欲為也然朝廷大議中外已聞不宜久

而不決昨自春首以來陛下服藥于內大臣早夜不敢歸家飲食醫藥侍于左右如人子之侍父自古君臣未有若此之親者也下至羣臣士庶婦女嬰孩晝夜禱祈填咽道路發於至誠不可禁止以此見臣民盡忠蒙陛下之德厚愛陛下之意深故為陛下之慮遠也今之所請天下臣民所以為愛君計也陛下何疑而不從乎中外之臣既喜陛下聖躬康復又欲見皇子出入宮中朝夕問安侍膳于左右然後文武羣臣奉表章為陛下賀

辭人墨客稱述本支之盛為陛下歌之頌之豈不美哉
伏願陛下出於聖斷擇宗室之賢者依古禮文且以為
子未用立為儲副也既可以徐察其賢否亦可以俟皇
子之生臣又見樞密使狄青出自行伍遂掌樞密如初
議者已為不可今三四年間外雖未見過失而不幸有
得軍情之名且武臣掌國機密而得軍情豈是國家之
利臣前有封奏其說甚詳具述青未是竒材但於今世
將率中稍可稱耳雖其心不為惡不幸為軍士所喜深

恐因此陷青以禍而為國家生事欲乞且罷青樞務任以一州既以保全青亦為國家消未萌之患蓋緣軍中士卒及閭巷人民以至士大夫間未有不以此事為言者惟陛下未之知爾臣之前奏乞留中而出自聖斷若陛下猶以臣言為疑乞出臣前奏使執政大臣公議此二者當今之急務也凡所謂五行災異之學臣雖不深知然其大意可推而見也五行傳曰簡宗廟則水為災陛下嚴奉祭祀可謂至矣惟未立儲貳易曰主器莫若

長子殆此之警戒乎至於水者陰也兵亦陰也武臣亦陰也此推類而易見者天之譴告苟不虛發惟陛下深思而早決庶幾可以消弭災患而轉為福應也臣伏覩詔書曰悉心以陳無有所諱故臣敢及之若其他時政之失必有羣臣應詔為陛下言者臣言狂計愚惟陛下

裁擇

論美人張氏恩寵宜加裁損劄子

他人所不敢言亦所不能言

臣近風聞禁中因皇女降生於左藏庫取綾羅八千疋
染院工匠當此大雪苦寒之際敲冰取水染練供應頗
甚艱辛臣伏思陛下恭儉勤勞愛民憂國以此勞人枉
費之事必不肯為然外議相傳皆云見今染練未絕臣
又見近日內降美人張氏親戚恩澤太頻臣忝為諫官
每聞小有虧損聖德之事須合力言難避天譴臣竊見
自古帝王所寵嬪御若能謙儉柔善不求恩澤則可長
保君恩或恣意驕奢多求恩澤則皆速致禍敗臣不敢

遠引古事只以今宮禁近事言之陛下近年所寵尚氏
楊氏余氏苗氏之類當其被寵之時驕奢自恣不早裁
損及至滿盈今皆何在况聞張氏本良家子昨自脩媛
退為美人中外皆聞以謂與楊尚等不同故能保寵最
久今一旦宮中取索頗多恩澤日廣漸為奢侈之事以
招外人之言臣不知陛下欲愛惜保全張氏或欲縱恣
而敗之若欲保全則須常令謙儉不至驕盈臣料八十
尺綾羅必非張氏一人獨用不過支散與衆人而已乃

是枉費財物盡為衆人至於中外譏議則陛下自受以此而言廣散何益昨正月一日曹氏封縣君至初五日又封郡君四五日間兩度封拜又聞別有內降應是疏遠親戚盡求恩澤父母因子而貴可矣然名分亦不可太過其他踈遠皆可減罷臣謂張氏未入宮之前踈遠親戚各皆何在今日富貴何必廣為閑人自招謗議以累聖德若陛下只為張氏計亦宜如此况此事不獨為張氏大凡後宮恩澤太多宮中用度奢侈皆是虧損聖

德之事繫於國體臣合力言伏望聖慈防微杜漸早為
裁損取進止

論議濮安懿王典禮劄子

宋人並以歐公建議為非然其據經論辨處亦自
精密

臣伏見朝廷議濮安懿王典禮兩制禮官請稱皇伯中
書之議以謂事體至大理宜慎重必合典故方可施行
而皇伯之稱考於經史皆無所據方欲下三省百官博

訪羣議以求其當陛下屈意手詔中罷而衆論紛然至今不已臣以謂衆論雖多其說不過有三其一曰宜稱皇伯者是無稽之臆說也其二曰簡宗廟致水災者是厚誣天人之言也其三曰不當用漢宣哀為法以干亂統紀者是不廣本末之論也臣請為陛下條列而辨之謹按儀禮喪服記曰為人後者為其父母報報者齊衰期也謂之降服以明服可降父母之名不可改也又按開元開寶禮國朝五服年月喪服令皆云為人後者為

其所生父齊衰不杖期蓋以恩莫重於所生故父母之名不可改義莫重於所繼故寧抑而降其服此聖人所制之禮著之六經以為萬世法者是中書之議所據依也若所謂稱皇伯者考於六經無之方今國朝見行典禮及律令皆無之自三代之後秦漢以來諸帝由藩邸入繼大統者亦皆無之可謂無稽之臆說矣夫儀禮者聖人六經之文開元禮者有唐三百年所用之禮開寶通禮者聖宋百年所用之禮五服年月及喪服令亦皆

祖宗累朝所定方今天下共行之制今議者皆棄而不
用直欲自用無稽之臆說此所以不可施行也其二曰
簡宗廟致水災者臣伏以上天降災皆主人事故自古
聖王逢災恐懼多求闕政而修之或自知過失而改悔
之庶幾以塞天譴然皆須人事已著於下則天譴為形
於上今者濮王之議本因兩制禮官違經棄禮用其無
稽之臆說欲定皇伯之稱中書疑其未可施行乃考古
今典禮雖有明據亦未敢自信而自專方更求下外廷

博議而陛下遽詔中罷欲使有司徐求典禮是則臣下
慎重如此人君謙畏如此君臣不敢輕議妄舉而天遽
譴怒殺人害物此臣所謂厚誣天也議猶未決仍罷不
議而便謂兩統二父以致天災者厚誣人也其三引漢
宣哀之事者臣謹按漢書宣帝父曰悼皇考初稱親諡
曰悼置奉邑寢園而已其後改親稱皇考而立廟京師
皇考者親之異名爾皆子稱其父之名也漢儒初不以
為非也自元帝以後貢禹韋玄成等始建毀廟之議數

十年間毀立不一至哀帝時大司徒平晏等百四十七人奏議云親謚曰悼裁置奉邑皆應經義是不非宣帝稱史皇孫為親也所謂應經義者即儀禮云為人後者為其父母報是也惟其立廟京師亂漢祖宗昭穆故晏等以謂兩統二父非禮宜毀也定陶恭王初但號共皇立廟本國師丹亦無所議至其後立廟京師欲去定陶不繫以國有進干漢統之漸丹遂大非之故丹議云定陶恭皇謚號已前定議不得復改而但論立廟京師為

不可爾然則稱親置園皆漢儒所許以為應經義者惟去其國號立廟京師則不可爾今言事者不究朝廷本議何事不尋漢臣所非者何事此臣故謂不原本未也中書之議本謂稱皇伯無稽而禮經有不改父名之義方議名號猶未定故尊崇之禮皆未及議而言事者便引漢去定陶國號立廟京師之事厚誣朝廷以為干亂大統何其過論也夫去國號而立廟京師以亂祖宗昭穆此誠可非之事若果為此議宜乎指臣等為姦邪之

臣而人主有過舉之失矣其如陛下之意未嘗及此而中書亦初無此議而言事者不原本末過引漢世可非之事以為說而外庭之臣又不審知朝廷本議如何但見言事者云云遂以為欲加非禮干亂統紀信為然矣是以衆口一辭紛然不止而言事者欲必遂其皇伯無稽之說牽引天災恐迫人主而中書守經執禮之議反指以為姦邪之言朝廷以言事之臣禮當優容不欲與之爭辨而外庭羣論又不可家至而戶曉是非之禮不

辨上下之情不通此所以嗷嗷而不止也夫為人後者
既以所後為父矣而聖人又存其所生父名者非曲為
之意也蓋自有天地以來未有無父而生之子也既有
父而生則不可諱其所生矣夫無子者得以宗子為後
是禮之所許也然安得無父而生之子以為後乎此聖
人所以不諱無子者立人之子以為後亦不諱為人後
者有父而生蓋不欺天不誣人也故為人後者承其宗
之重任其子之事而不得復歸於本宗其所生父母亦

不得往與其事至於喪服降而抑之一切可以義斷惟其父母之名不易者理不可易也易之則欺天而誣人矣子為父母服謂之正服出為人後者為本生父母齊衰期謂之降服又為所後父斬衰三年謂之義服今若以本生父為皇伯則濮安懿王為從祖父反為小功而濮王夫人是本生嫡母也反為義服自宗懿以下本生兄弟於禮雖降猶為大功是禮之齊衰期今反為小功禮之正服今反為義服上於濮王父也反服小功於宗

懿等兄弟也反服大功此自古所以不稱所生父為伯父叔父者稱之則禮制乖違人倫錯亂如此也伏惟陛下聰明睿聖理無不燭今衆人之議如彼中書之議如此必將從衆乎則衆議不見其可欲違衆乎則自古為國未有違衆而能舉事者願陛下需然下詔明告中外以皇伯無稽決不可稱而今所欲定者正名號爾至於立廟京師于亂統紀之事皆非朝廷本議庶幾羣疑可釋若知如此而猶以謂必稱皇伯則雖孔孟復生不能

復為之辨矣

予按濮議所請稱親置園立廟濮王之子若孫世守其祀本出於天下萬世之公而非有悖於典禮者特當時臺諫呂誨范鎮等過激故為紛紛耳至於本朝興獻帝事大畧與此相同蓋亦天理人情之不容已者張桂首議時予方以髫年侍先輩間先輩每語及輒為怒而裂眦及讀大禮或問爽然自失矣然呂范諸公始以議禮

被譴已而復起張桂用事後而議禮諸臣錮且
沒齒矣予特為之累欬太息云

論葬荆王後贈燕王一行事劄子

本朝唯三原王公可及

臣風聞已有聖旨荆王葬事令三司與太常禮院及監
葬官等同議減節浮費此足見陛下厚於皇叔之思念
民惜費之意一舉而兩得也然臣每見朝廷作事欲愛
民節用而常枉費勞人蓋為議事之初不得其要或失

於不精審者有四民間不科配一也州縣供應物有定數二也送葬之人在路禁其呼索三也州縣官吏不得過外供須以邀名譽四也苟絕此四者則無大患矣昨京西一路遭張海驚劫之後不可更有誅求臣今欲乞指揮三司應是合要之物並須官給不得民間科買仍乞先將一行儀仗人馬并送葬人等一人以上先定人數然後劄與京西令依數供頓則可無廣費自荆王以下諸喪非至親者不必令其盡往仍乞限定人數及每

人將帶隨行人數亦乞限定凡皇親及一行官吏除宿
頓合供飲食外不得數外呼索州縣官吏亦不得於官
供飲食外別以諸物獻送權要其受獻送并呼索並以
入已贓論仍乞選御史裏行一人隨行糾察其數外帶
人及州縣隨順呼索獻送物等官吏物出於已亦從違
制若託以供應為名於民間賤買及率掠者皆以枉法
贓論如此防禦方可杜絕浮費以稱陛下厚親節用之

心

論葬荆王劄子

總只是恤財用上為本

臣伏覩朝旨雖差宋祁監護故荆王葬事然未見降下葬日及一行事件或聞以歲月不利未可葬或聞有司以財用不足乞且未葬夫陰陽拘忌之說陛下聰明睿聖必不信此巫卜之言而違禮典但慮議者堅執方今財用不足不可辦葬陛下聞有勞民枉費之說則不得不慮因以遲疑臣謂前後勅葬大臣浮費枉用之物至

多豈是朝廷本意皆為主司措置之失致人因緣以為
姦爾今若盡節浮費及絕其侵蠹而使用物不廣則將
復以何辭而云不葬此不知所司曾將一行用度計定
大數否內若干是浮費若干是實用若實用之物數猶
至多而力不可辦則緩之可也若實用之物少只是舊
例浮費多則可削去浮費而已今都不計度而但云無
物可葬則不可也未見實用之數多少不量力能及否
而曰必須遵禮而曰必須葬亦未可也如臣愚見酌此

兩端葬則為便然須先乞令王堯臣宋祁等將一行合用之物列其名件內浮費不急者一一減去之若只留實用之物數必不多假如稍多更加節減雖至儉薄理亦無害如此則葬得及時物亦不費夫儉葬古人之美節侈葬古人之惡名今避儉葬不肯節費留喪而待有物之年以就侈葬則非臣所知也若曰儉葬亦未能辦則乃過言之甚也然外之輿議為國家論事體者皆云葬則為便今朝廷議者分而為二顧物力者則不顧典

禮國體論典禮國體者則不思財用辦否各執偏見議
久不決以惑陛下之聰明今便葬之害一不葬之害五
便葬之害不過費物然力有可為不葬之害所失則大
不肯薄葬而留之以待侈葬成王之惡名一也信巫卜
之說而違典禮二也目下減節力所易為他時豐足禮
或難待使皇叔之柩五七年間不得安宅而神靈無歸
三也使四夷聞天子皇叔薨而無錢出葬遂輕中國而
動心四也今天下物力雖乏然凡百用度不能節費處

多獨於皇叔之身有所裁損傷陛下孝治之美五也此
臣所謂葬則為便者也荆王於國屬最尊名位最重伏
乞早令定議無使後時取進止



唐宋八大家文鈔卷三十

欽定四庫全書

集部

唐宋八大家文鈔卷三十一

詳校官左中允臣瑋五珠

侍讀臣孫球覆勘

總校官檢討臣何思鈞

校對官庶吉士臣潘庭筠

謄錄監生臣馮曰琮

欽定四庫全書

唐宋八大家文鈔卷三十一

明 茅坤 撰

廬陵文鈔三

劄子

論乞主張范仲淹富弼等行事劄子

歐陽公此時亦必聞范富所條之事恐仁宗一時不肯遽行又怕羣小內攻故先為頂門一針

語所謂拿雲手是也

臣伏聞范仲淹富弼等自被手詔之後已有條陳事件
必須裁擇施行臣聞自古帝王致治須待同心叶力之
人而君臣相得謂之千載一遇之難今仲淹等遇陛下
聖明可謂難逢之會陛下有仲淹等亦可謂難得之臣
陛下既已傾心待之仲淹等亦又各盡心思報上下如
此臣謂事無不濟但顧行之如何伏况仲淹弼是陛下
特出聖意自選之人初用之時天下已皆相賀然猶竊

謂陛下既能選之未知用之如何耳及見近日特開天章從容訪問親寫手詔督責丁寧然後中外喧然既驚且喜此二盛事固已朝報京師暮傳四海皆謂自來未曾如此責任大臣天下之人延首拭目以看陛下欲作何事此二人所報陛下果有何能是陛下得失在此一舉生民休戚繫此一時以此而言則仲淹等不可不盡心展効陛下不宜不力主而行使上不玷知人之明下不失四海之望臣非不知陛下專心銳志必不自怠而

中外大臣且憂國同心必不相忌而沮難然臣所慮者
仲淹等所言必須先絕僥倖因循姑息之事方能救數
世之積弊如此等事皆外招小人之怨怒不免浮議之
紛紜而姦邪未去之人亦須時有讒沮若稍聽之則事
不成矣臣謂當此事初尤須上下叶力凡小人怨怒仲
淹等自以身當浮議姦讒陛下亦須力拒待其久而漸
定自可日見成功伏望聖慈留意終始成之則社稷之
福天下之幸也取進止

論賈昌朝除樞密使劄子

貓之捕鼠須咬頸公之彈劾昌朝却本所薦引
之路攻之仁廟焉得不動心

臣伏見近降制書除賈昌朝為樞密使旬日以來中外
人情莫不疑懼措紳公議漸以沸騰蓋緣昌朝稟性回
邪執心傾險頗知經術能文飾姦言好為陰謀以陷害
良士小人朋附者衆皆樂為其用前在相位累害善人
所以聞其再來望風恐懼陛下聰明仁聖勤儉憂勞每

於用人尤所審慎然而自古毀譽之言未嘗不並進於前而聽納之際人主之所難也臣以謂能知聽察之要則不失之矣何謂其要在先察毀譽之人若所譽者君子所毀者小人則不害其進用矣若君子非之小人譽之則可知其人不可用矣今有毅然立於朝危言讜論不阿人主不附權臣其直節忠誠為中外素所稱信者君子也如此等人皆以昌朝為非矣宦官宮女左右使令之人往往小人也如此等人皆以昌朝為是矣陛下

察此則昌朝為人可知矣今陛下之用昌朝與執政大臣謀而用之乎與立朝忠正之士謀而用之乎與宦官左右之臣謀而用之乎或不謀於臣下斷自聖心而用之乎昨聞昌朝陰結宦豎構造事端謀動大臣以圖進用若陛下與執政大臣謀之則大臣勢在嫌疑必難啟口若立朝忠正之士則無不以為非矣其稱譽昌朝以為可用者不過宦官左右之人爾陛下用昌朝為天下而用之乎為左右之人而用之乎臣伏思陛下必不為

左右之人而用之也然左右之人謂之近習朝夕出入
進見無時其所讒諛能使人主不覺其漸昌朝善結宦
官人人喜為稱譽朝一人進一言暮一人進一說無不
稱昌朝之善者陛下視聽漸熟遂簡在于聖心及將用
之時則不必與謀也蓋稱薦有漸久已熟于聖聰矣是
則陛下雖斷自聖心不謀臣下而用之亦左右之人積
漸稱譽之力也陛下常患近歲以來大臣體輕連為言
事者彈擊蓋由用非其人不叶物議而然也今昌朝身

為大臣見事不能公論乃結交中貴因內降以起獄以
此規圖進用竊聞臺諫方欲論列其過惡而忽有此命
是以中外疑懼物論喧騰也今昌朝未來議論已如此
則使其在位必不免言事者上煩聖聽若不爾則昌朝
得遂其志傾害善人壞亂朝政必為國家生事臣愚欲
望聖慈抑左右陰薦之言採摺紳公正之論早罷昌朝
還其舊鎮則天下幸甚臣官為學士職號論思見聖心
求治甚勞而一旦用人偶失而外庭物議如此既有見

聞合思裨補取進止

論臺諫官唐介等宜早牽復劄子

歐公至言

臣材識庸暗碌碌於衆人中蒙陛下不次拔擢置在樞
府其於報効自宜如何而自居職以來已逾半歲凡事
關大體必須衆議之協同其餘日逐進呈皆是有司之
常務至於謀猷啓沃茂爾無聞上辜聖恩下愧清議人
雖未責臣豈自安所以日夜思惟願竭思慮苟有可採

冀禪萬一臣近見諫官唐介臺官范師道等因言陳旭
事得罪或與小郡或竄遠方陛下自臨御已來擢用諍
臣開廣言路雖言者時有中否而聖慈每賜優容一旦
臺諫聯翩被逐四出命下之日中外驚疑臣雖不知臺
諫所言是非但見唐介范師道皆久在言職其人立朝
各有本末前後補益甚多豈於此時頓然改節故為欺
罔上昧聖聰在於人情不宜有此臣竊以謂自古人臣
之進諫於其君者有難有易各因其時而已若剛暴猜

忌之君不欲自聞其過而樂聞臣下之過人主好察多疑於上大臣側足畏罪於下於此之時諫人主者難而言大臣者易若寬仁恭儉之主動遵禮法自聞其失則從諫如流聞臣下之過則務為優容以保全之而為大臣者外秉國權內有左右之助言事者未及見聽而怨仇已結於其身故於此時諫人主者易言大臣者難此不可不察也自古人主之聽言也亦有難有易在知其術而已夫忠邪並進於前而公論與私言交入于耳此

所以聽之難也若知其人之忠邪辨其言之公私則聽之易也凡言拙而直逆耳違意初聞若可惡者此忠臣之言也言婉而順希旨合意初聞若可喜者邪臣之言也至於言事之官各舉其職或當朝正色顯言于廷或連章列署共論其事言一出則萬口爭傳衆目共視雖欲為私其勢不可故凡明言于外不畏人知者皆公言也若非其言職又不敢顯言或密奏乞留中或面言乞出自聖斷不欲人知言有主名者蓋其言涉傾邪懼遭

彈劾故凡陰有奏陳而畏人知者皆挾私之說也自古
人主能以此術知臣下之情則聽言易也伏惟陛下仁
聖寬慈躬履勤儉樂聞諫諍容納直言其於大臣尤所
優禮常欲保全終始思與臣下愛惜名節尤慎重於進
退故臣謂方今言事者規切人主則易欲言大臣則難
臣自立朝耳目所記景祐中范仲淹言宰相呂夷簡貶
知饒州皇祐中唐介言宰相文彥博貶春州別駕至和
初吳中復呂景初馬遵言宰相梁適並罷職出外其後

趙抃范師道言宰相劉沆亦罷職出外前年韓絳言
弼貶知蔡州今又唐介等五人言陳旭得罪自范仲
貶饒州後至今凡二十年間居臺諫者多矣未聞有
諫人主而得罪者臣故謂方今諫人主則易言大臣
難陛下若推此以察介等所言則可知其用心矣昨
罷黜臺諫五人惟呂誨入臺未久其他四人出處本
迹狀甚明可以歷數也唐介前因言文彥博遠竄廣
煙瘴之地賴陛下仁慈哀憐移置湖南得存性命范

道趙抃並因言忤劉沆罷臺職守外郡連延數年然復今三人者又以言樞臣罷黜然則介不以前蹈必之地為懼師道與抃不以中滯進用數年為戒遇事言得罪不悔蓋所謂進退一節終始不變之士也至王陶者本出孤寒只因韓絳薦舉始得臺官及絳為丞陶不敢內顧私恩與之諍議絳終得罪夫牽顧私人之常情爾斷恩以義非知義之士不能也以此言陶可謂狗公滅私之臣矣此四人者出處本末之迹

此可以知其為人也。就使言雖不中，亦其情必無他議者。或謂言事之臣好相朋黨，動搖大臣以作威勢，臣竊以謂不然。介與師道不與絳為黨，乃與諸臺諫共論絳為非，然則非相朋黨。非欲動搖大臣，可明矣。固謂未可。以此疑言事之臣也。况介等比者，雖為謫官，幸蒙陛下寬恩，各得為郡。未至失所，其可惜者。斥逐諫臣，非朝廷美事。阻塞言路，不為國家之利。而介等盡忠守節，未蒙憐察也。欲望聖慈，特賜召還。介等置之朝廷，以勸守節。

敢言之士則天下幸甚今取進止

薦王安石呂公著劄子

王荆公學行屬望固以不難而呂申公則歐公所
仇而屢斥之者今舉其子可見公之公平正大矣
臣伏見陛下仁聖聰明優容諫諍雖有狂直之士犯顏
色而觸忌諱者未嘗不終始保全徃徃亟加擢用此自
古明君賢主之所難也然而用言既難獻言者亦不為
易論小事者既可鄙而不足為陳大計者又似迂而無

速効欲微諷則未能感動將直陳則先忤貴權而旁有
羣言奪於衆力所陳多未施設其人遽已改遷致陛下
有聽言之勤而未見用言之効頗疑言事之職但為速
進之階蓋緣臺諫之官資望已峻少加進擢便履清華
而臣下有厭人言者因此亦得進說直云此輩務要官
職所以多言使後來者其言益輕而人主無由取信辜
陛下納諫之意違陛下賞諫之心臣以謂欲救其失惟
宜擇沉默端正守節難進之臣置之諫署則既無干進

之疑庶或其言可信伏見殿中丞王安石德行文學為
衆所推守道安貧剛而不屈司封員外郎呂公著是夷
簡之子器識深遠沉静寡言富貴不染其心利害不移
其守安石久更吏事兼有時才會召試館職固辭不就
公著性樂閒退淡於世事然所謂夫人不言言必有中
者也往年陛下上遵先帝之制增置臺諫官四員已而
中廢復止兩員今諫官尚有虛位伏乞用此兩人補足
四員之數必能規正朝廷之得失裨益陛下之聰明臣

叨被恩榮未知報効苟有所見不敢不言取進止

薦司馬光劄子

司馬公之不伐歐公之推賢可謂兩得之矣

臣伏見龍圖閣直學士司馬光德性淳正學術通明自
列侍從久司諫諍謹言嘉話著在兩朝自仁宗至和服
藥之後羣臣便以皇嗣為言五六年間言者雖多而未
有定議最後光以諫官極論其事敷陳激切感動主聽
仁宗豁然開悟遂決不疑由是先帝選自宗藩人為皇

子曾未踰年仁宗奄棄萬國先帝入承大統蓋以人心
先定故得天下帖然今以聖繼聖遂傳陛下由是言之
光於國有功為不淺矣可謂社稷之臣也而其識慮深
遠性尤慎密光既不自言故人亦無知者臣以忝在政
府因得備聞其事臣而不言是謂蔽賢掩善詩云無言
不酬無德不報光今雖在侍從日承眷待而其忠國大
節隱而未彰臣既詳知不敢不奏

乞獎用孫沔劄子

老成典刑之見

臣伏見諒祚猖狂漸違誓約僭叛之迹彰露已多年歲之間必為邊患國家禦備之計先在擇人而自慶厯罷兵以來至今二十餘年當時經用舊人零落無幾惟尚書戶部侍郎孫沔尚在西事時沔守環慶一路其人磊落有智勇仁以未嘗出兵又不遇敵故未有臨陣破賊之功然其養練士卒招撫蕃夷恩信著於一方至今邊人思之雖世不乏材朝廷方務推擇若求曾經西事可

用之人則臣謂無如沔者沔今年雖七十聞其心力不衰飛鷹走馬尚如平日况所用者取其智謀藉其威信前世老將彊起成功者多沔雖中間曾以罪廢弃取使過正是用人之術臣今欲乞朝廷更加察訪如沔實未衰羸伏望聖慈特賜獎用庶於擇材難得之時可備一方之寄取進止

止絕呂夷簡暗入文字劄子

此即古人斜封之戒文凡五轉

臣風聞呂夷簡近日頻有密奏仍聞自乞於御藥院暗
入文字不知實有此事否但外人相傳上下疑懼臣謂
夷簡身為大臣久在相位尚不能為陛下外平四夷內
安百姓致得二國交構中國憂危兵民疲勞上下困乏
賢愚失序賞罰不中凡百紀綱幾至大壞筋力康健之
日尚且如此乖繆況已罷政府久病家居筋力已衰神
識昏耗豈能更與國家圖事據夷簡當此病廢即合杜
門自守不交人事縱有未忘報國之意凡事即合公言

令外廷見當國政之臣共議可否豈可暗入大書眩惑
天聽况夷簡患攤風手足不能舉動凡有奏聞必難自
寫其子弟輩又不肖須防詐偽或恐漏泄於體尤為不
便雖陛下至聖至明於夷簡姦謀邪說必不聽納但外
人見夷簡密入大書恐非公論若誤國計為患不輕夷
簡所入文字伏乞明賜止絕臣聞任賢勿貳去邪勿疑
見今中外羣臣各有職事苟有關失自可任責不可更
令無功已退之臣轉相惑亂取進止

論狄青劄子

言人之所難言見人之所不見只緣宋承五代
之後歐公故不得不為過慮然亦回護狄公狄
公亦所甘心

臣聞人臣之能盡忠者不敢避難言之事人主之善馭
下者常欲聞難言之言然後下無隱情上無壅聽姦宄
不作禍亂不生自古固有伏藏之禍未發之機天下之
人皆未知而有一人能獨言之人主又能聽而用之則

銷患於未萌轉禍而為福者有矣若夫天下之人共知而獨人主之不知者此莫大之患也今臣之所言者乃天下之人皆知而惟陛下未知也今士大夫無貴賤相與語于親戚朋友下至庶民無愚智相與語于閭巷道路而獨不以告陛下也其故何哉蓋其事伏而未發言者難於指陳也臣竊見樞密使狄青出自行伍號為武勇自用兵陝右已著名聲及捕賊廣西又薄立勞効自其初掌機密進列大臣當時言事者已為不便今三四

年間雖未見其顯過然而不幸有得軍情之名推其所
因蓋由軍士本是小人面有點文樂其同類見其進用
自言我輩之內出得此人既以為榮遂相悅慕加又青
之事藝實過於人比其輩流又粗有見識是以軍士心
共服其材能國家從前難得將帥經畧招討常用文臣
或不知軍情或不閑訓練自青為將領既能自以勇力
服人又知訓練之方頗以恩信撫士以臣愚見如青所
為尚未得古之名將一二但今之士卒不慣見如此等

事便謂須是我同類中人乃能知我軍情而以恩信撫我青之恩信亦豈能徧及於人但小人易為扇誘所謂一犬吠形百犬吠聲遂皆翕然喜共稱說且武臣掌機密而得軍情不唯於國家不便亦於其身未必不為害然則青之流言軍士所喜亦其不得已而勢使之然也臣謂青不得已而為人所喜亦將不得已而為人所禍者矣為青計者宜自退避事權以止浮議而青本武人不知進退近日以來訛言益甚或言其身應圖讖或言

其宅有火光道路傳說以為常談矣而惟陛下猶未聞也且唐之朱泚本非反者倉卒之際為軍士所迫爾大抵小人不能成事而能為患者多矣泚雖自取族滅然為德宗之患亦豈小哉夫小人陷於大惡未必皆其本心所為直由漸積以至蹉跌而時君不能制患於未萌爾故臣敢昧死而言人之所難言者惟願陛下早聞而省察之耳如臣愚見則青一常才未有顯過但為浮議所喧勢不能容爾若如外人衆論則謂青之用心有不

可知者此臣之所不能決也但武臣掌機密而為軍士所喜自於事體不便不計青之用心如何也伏望聖慈深思遠慮戒前世禍亂之迹制於未萌密訪大臣早決宸斷罷青機務與一外藩以此觀青去就之際心迹如何徐察流言可以臨事制變且二府均勞逸而出入亦是常事若青之忠孝出處如一事權既去流議漸消則其誠節可明可以永保終始夫言未萌之患者常難於必信若俟患之已萌則又言無及矣臣官為學士職號

論思聞外議喧沸而事繫安危臣言狂計愚不敢自默
取進止

論水洛城事宜乞保全劉滄等劄子

何等熟慮何等忠悃

臣近風聞狄青與劉滄爭水洛城事枷禁滄等奏來竊
以邊將不和用兵大患况狄青劉滄皆是可惜之人事
體須要兩全利害最難處置臣聞水洛城自曹瑋以來
心知其利患於難得未暇經營今滄能得之則於滄之

功不小於秦州之利極多昨韓琦等自西來聞有論奏非以水洛為不便但慮難得而難成今滬能得之又有成之之志正宜專委此事責其必成而狄青所見不同遂成釁隙其間利害臣請詳言國家近年邊兵屢敗常患大將無權今若更沮狄青釋放劉滬則不惟於狄青之意不足兼沿邊諸將皆挫其威此其不便一也臣聞劉滬經營水洛城之初奮身展効不少先以力戰取勝然後誘而服從乃是党留諸族畏滬之威信今忽見滬

先得罪帶枷入獄則新降生戶豈不驚疑若使翻然復叛則今後邊臣以威信招誘諸族誰肯聽從不惟水洛城更無可成之期兼沿邊生戶永無可招之理此其不便二也自用兵以來諸將為國立事者少此水洛城不惟自曹瑋以來未能得之亦聞韓琦近在秦州嘗欲經營而未暇今滬奮然力取其功垂就而中道獲罪遂無所成則今後邊將誰肯為國家立事此其不便三也臣又聞水洛之戍雖能救援秦州而須藉渭州應副今劉

滬既與狄青異議縱使水洛築就他時萬一緩急狄青怒滬異已又欲遂其偏見稍不應副則水洛必須復失其不便四也緣此之故遂移青於別路則是因一小將移一部署此其不便五也此臣所謂利害甚多最難處置者也臣謂今宜遣一中使處分魚周詢等速令和解務要兩全必先密諭狄青曰滬城水洛本有所稟非是擅為役衆築城不比行師之際滬見利堅執意在成功不可以違節制加罪滬宜釋放朝廷不欲直放恐挫卿

之威卿自釋之使感卿惠若他時出師臨陣有違進退
之命者任卿自行軍法然後密諭滄曰汝違大將指揮
自合有罪朝廷以汝於水洛展効望汝成功故諭青使
赦汝責爾卒事以自贖俟水洛功就則又戒青不可因
前曾異議堅執不修惟幸失之遂已偏見今後水洛緩
急尤須極力應副萬一小有踈失則是汝挾情故陷之
必有重刑如此則水洛之利可成蕃戶之恩信不失邊
將立事者不懈大將之威不挫苟不如此未見其可蓋

罪滬既不可罷水洛城又不可沮狄青又不可事關利害伏望聖慮深思取進止

論罷鄭戩四路都部署劄子

肇畫中將領機宜

臣伏覩勅除鄭戩知永興軍仍兼陝西都部署自聞此命外人議論皆以為非在臣思之實亦未便竊以兵之勝負全由處置如何臣見用兵以來累次更改或四路都置部署或分而各領一方乍合乍離各有利害惟夏

竦往年所任鄭戩今日之權失策最多請試條列臣聞古之善用將者先問能將幾何今而不復問戩能將幾何直以關中數十州之廣蕃漢十萬之兵沿邊二千里之事盡以委之此其失者一也或曰戩雖名都部署而諸路自有將又其大事不令專制而必稟朝廷假如邊將有大事先稟於戩又稟於朝廷朝廷議定下戩戩始下於沿邊只此一端自可敗事其失二也今大事戩既不專若小事又不由戩則部署一職止是虛名若

小事一一問戩則四路去永興皆數百里其寨柵遠者千餘里使戩一一處分合宜尚有遲緩之失萬一耳目不及處置失宜則為害不細其失三也若大小事都不由戩而但使帶其權豈有數十州之廣數十萬之兵二三千之邊事作一虛名使為無權之大將若知戩可用則推心用之若知不可用則善罷之豈可盡闕中之大設為虛名而以不誠待人其失四也今都部署名統四路而諸將事無大小不稟可行則四路偏裨各見其

將不由都帥則上下相效皆欲自專其失五也今都部
署是大將反不得節制四路而遂路是都帥部將却得
專制一方則委任之意大小乖殊軍法難行名體不順
其失六也若知戩果不可大用但不敢直罷其職則是
大臣顧人情避己怨如此作事何以弭息人言其失七
也料朝廷忽有此命必因韓琦等近自西來有此擘畫
琦等身在邊陲曾為將帥豈可如此失計臣今欲乞令
兩府之臣明議四路不當置都部署利害其鄭戩既不

可內居永興而遙制四路則乞落其虛名只令坐鎮長
安撫民臨政以為關中之重其任所繫亦大而使四路
各責其將則事體皆順處置合宜今取進止

論張子奭恩賞太頻劄子

慨切

臣風聞知汝州范祥為相度陝西青白鹽勅差張子奭
權知汝州子奭自選入二年內遷至員外郎朝廷之意
雖曰賞勞而天下物議皆云僥倖蓋以子奭宣勞絕少

止兩次而遷官恩賜已數重自古賞功不過一次賞之
不已故難弭人言初自選人改京官曰賞勞未及二歲
改秘書丞又曰賞勞賜以章服又曰賞勞秘書丞不久
又轉官又曰賞勞合得太常博士超遷員外郎又曰賞
勞後行祠部為名曹又曰賞勞作京官合作知縣而作
簽判又曰賞勞一任未滿合更有一任知縣又超通判
差遣又曰賞勞此所以外人之議不允也況范祥暫出
勾當只合交割以次官員或轉運司自差人權今朝廷

差人已是失體又於子輿為此僥倖今朝臣待闕在京者甚衆豈無一人堪權知州者朝廷每用一人必當使天下人服今每一差遣則物議沸騰累日不息昔五代桑維翰為晉相一夕除節度使十五人為將而人皆服其精今中書差一權知州而不能免人譏議者蓋事無大小當與不當而已其張子輿伏乞追寢權差之命仍乞今後外處差出知州只委本路轉運使差官權至於賞罰之柄貴在至公今莫大之罪不過一刑而止豈有

勞者終身行賞而不已亦乞今後有勞効之人量其大小一賞而止若其別著能効則拔擢自可不次人亦自然無言伏以朝廷用人惟患守例而不能不次選任但不涉於僥倖實有材藝之人誰敢有言子夔作使西鄙不謂無勞但恩典已優於賞已足可惜令天下指為僥倖之人而掩其前効况又上虧朝政不可不思取進止

論江淮官吏劄子

臣聞江淮官吏等各為王倫事奏案已到多時而尚未

聞斷遣仍聞議者猶欲寬貸臣聞昨來江淮官吏或斂物獻送或望賊奔迎或獻納兵甲或同飲宴臣謂倫一叛卒偶肆猖狂而官吏敢如此者蓋知賊可畏而朝廷不足畏也今若更行寬貸則紀綱隳壞盜賊縱橫天下大亂從此始矣何以知之昨王倫事起江淮官吏未行遣之間京西官吏又已棄城而走望賊而迎若江淮官吏不重行遣則京西官吏亦須輕恕京西官吏見江淮官吏已如此則天下諸路亦指此兩路為法在處官吏

皆迎賊棄城獻兵納物矣則天下何由不大亂也臣伏
思祖宗艱難創造基圖陛下憂勤嗣守先業而一旦四
夷外叛盜賊內攻其壞之者誰哉皆由前後迂繆之臣
因循寬弛使朝威不振綱紀遂墮今已壞之至此而猶
不革前非以寬濟寬何以救弊如晁仲約等情法至重
俱合深行議者無由曲解或聞以謂自是朝廷素不為
備不可全罪外官假如有殺父與兄者豈可只言自是
朝廷素無教化而不罪殺親之人又如有人掠奪生人

男女金帛不可只言自是朝廷素無禮讓而不罪劫人之賊迂儒不可用可笑如此李熙古豈獨是朝廷素有備之州傅永吉豈獨是朝廷素練之兵蓋用命則破賊矣今朝廷素無禦備為大臣者又不責之守州縣者合有罪又寬之天下之事何人任責竊緣韓綱是大臣之家父子兄弟並在朝廷權要之臣皆是相識多方營救故先於江淮官吏寬之只要韓綱行遣不重今大臣不思國體但樹私恩惟陛下以天下安危為計出於聖斷

以勵羣下則庶幾國威粗振賞罰有倫其晁仲約等乞
重行朝典乞不寬恕取進止

唐宋八大家文鈔卷三十一

欽定四庫全書

唐宋八大家文鈔卷三十二

明 茅坤 撰

廬陵文鈔四

劄子

乞補館職劄子

是大體要處

臣竊以治天下者用人非止一端故取士不以一路若

夫知錢穀曉刑獄熟民事精吏幹勤勞夙夜以辦集為
功者謂之材能之士明於仁義禮樂通於古今治亂其
文章論議與之謀慮天下之事可以決疑定策論道經
邦者謂之儒學之臣善用人者必使有材者竭其力有
職者竭其謀故以材能之士布列中外分治百職使各
辦其事以儒學之臣置之左右與之日夕謀議講求其
要而行之而又於儒學之中擇其尤者置之廊廟而付
以大政使總治羣材衆職進退而賞罰之此用人之大

畧也由是言之儒學之士可謂貴矣豈在材臣之後也
是以前世英主明君未有不以崇儒嚮學為先而名臣
賢輔出於儒學者十常八九也臣竊見方今取士之失
患在先材能而後儒學貴吏事而賤文章自近年以來
朝廷患百職不修務獎材臣故錢穀刑獄之吏稍有寸
長片善為人所稱者皆已擢用之矣夫材能之士固當
擢用然專以材能為急而遂忽儒學為不足用使下有
遺賢之嗟上有乏材之患此甚不可也臣謂方今材能

之士不患有遺固不足上煩聖慮惟儒學之臣難進而多棄滯此不可不思也臣以庸繆過蒙任使俾陪宰輔之後然平日論議不能無異同雖日奉天威又不得從容曲盡拙訥今臣有館閣取士愚見具陳如別劄欲望聖慈因宴間之餘一迂睿覽或有可采乞常賜留意今取進止

按宋制館閣取士以三路進士高科一路也大
臣薦舉一路也歲月疇勞一路也而此外又有

制科召試以待非常之士而今獨有高第與庶
吉士兩項而已餘則並不可得

論乞令百官議事劄子

開誠布公之見漢唐以來所少者世宗庚戌年
寇犯京邑來通馬市亦下百官羣議亦同此惜
也次日又將出頭建議者並坐禍譴

臣伏見祖宗時猶用漢唐之法凡有軍國大事及大刑
獄皆集百官叅議蓋聖人慎於臨事不敢專任獨見欲

採天下公論擇其所長以助不逮之意也方今朝廷議
事之體與祖宗之意相背每有大事祕不使人知之惟
小事可以自決者却送兩制定議兩制知非急務故忽
畧拖延動經年歲其中時有一兩事體大者亦與小事
一例忽之至於大事祕而不宣此尤不便當處事之始
雖侍從之例皆不與聞已行之後事須彰布縱有乖誤
却欲論列則追之不及况外廷百官踈遠者雖欲有言
陛下豈得而用哉所以兵興數年西北二方累有事宜

處置多繆者皆由大臣自無謀慮而杜塞衆見也臣今欲乞凡有軍國大事度外廷須知而不可祕密者如此敵去年有請合從與不合從西戎今歲求和當許與不當許凡如此事之類皆下百官廷議隨其所見同異各令署狀而陛下擇其長者而行之不惟慎重大事廣採衆見兼又於庶官寒賤踈遠人中時因議論可見其高材敏識者國家得以用之若百官都無所長則自用廟堂之議至於小事並乞只令兩府自定其錢穀合要見

本末則召三司官吏至兩府討尋供析而使大臣自擇
至於禮法亦可召禮官法官詢問如此則事之大小各
得其體如允臣所請且乞將西戎請和一事先集百官
廷議取進止

論諫院宜知外事劄子

忠悃之識

臣竊聞近日為軍賊王倫事江淮州軍頻有奏報朝廷
不欲人知名進奏官等於樞密院責狀不令漏泄指揮

甚嚴不知此事出於聖旨或只是兩府大臣意欲如此以臣料之為近日言賊事者多朝廷欲人不知以塞言路耳臣謂方今多事之際雖有獨見之明尚須博採善謀以求衆助豈可聾聵羣聽杜塞人口况朝廷處事未必盡能合宜臣下獻忠未必全無可採至如王倫驅殺士民攻劫州縣江淮之上千里驚擾事已若斯何由掩蓋當今列辟之士極有憂國之人欲為人主獻言常患聞事不的况臺諫之官元是本职凡有論列貴在事初

善則開端惡則杜漸言於未發庶易回改今事無大小常患後時或號令已行或事迹已布縱欲論救多不能及若更秘密不使聞知則言事之臣何由獻說臣今欲乞指揮進奏院凡有事非實封者不須秘密臣因此更有起請事件畫一如後

一竊見御史臺見有進奏官逐日專供報狀欲乞依御史臺例選差進奏官一人凡有外方奏事及朝廷詔令除改並限當日內報諫院

一竊見唐制諫臣為供奉之官常在天子仗內朝廷密
議皆得聞之今雖未曾恢復舊制欲乞凡遇朝廷有
大處置四方奏報事非常程及諫官風聞事未得實
者並許詣兩府請問庶知審實得以論列

右件二事如允臣所請乞降指揮施行取進止

乞添上殿班劄子

臣伏見陛下自今春服藥已來羣臣不得進見今聖體康
裕日御前後殿視朝決事中外臣庶無不感悅然侍從臺

諫省府臣寮皆未曾得上殿奏事今雖邊鄙寧靜時歲豐稔民無疾厲盜賊不作天下庶務粗循常規皆不足上煩聖慮陛下可以遊心清閑頤養聖體然侍從臺諫省府臣寮皆是陛下朝夕左右論思獻納委任之臣豈可曠隔時月不得進見於前不惟亦有天下大務理當論述者至於臣子之於君父動經年歲不得進對豈能自安今欲望聖慈每遇前後殿坐日中書樞密院退後如審官三班銓司不引人則許臣寮一班上殿假以頃刻進瞻天威不勝臣

子區區之願也如允臣所請乞下閣門施行仍約束上殿
臣寮不得將干求恩澤訴理功過及細碎閑慢等事上煩
聖聰或乞約定上殿時刻所貴不煩久坐伏候勅旨

論任人之體不可疑劄子

的確

臣近見淮南按察使卽飾奏為體量知潤州席平為政
不治及不教閱兵士等朝廷以飾為未足信又下提刑
司再行體量臣竊以轉運提刑俱領按察然朝廷寄任

重者為轉運其次乃提刑爾今寄任重者言事反不信又質於其次者而決疑臣不知邵飾果是才與不才可信與否如不才不可信則一路數十州事豈宜委之若果才而可信又何疑焉又不知為提刑者其才與飾優劣如何若才過於飾尚可取信萬一不才於飾見事相背却言席平為才邵飾合有罔上之罪矣若反以罪飾臣料朝廷必不肯行若捨飾與席平俱不問則善惡不辨是非不分況席平曾作臺官立朝無狀只令制勘亦

不能了尋為御史中丞以不才奏罷朝廷兩府而下誰
不識平其才與不才人人盡知何必更令提刑體量然
後為定今外議皆言執政大臣託以審慎為名其實不
肯主事而當怨須待言事者再三陳述使被黜者知大
臣迫於言者不得已而行只圖怨不歸已苟誠如此豈
有念民疾苦澄清官吏之意哉若無此意只是好疑不
決則尤其是朝廷任人之失自去年以為轉運使不察官
吏特出詔書加以使名責其按察今按察使依稟詔書

舉其本職又却疑而不聽今後朝廷命令誰肯信之凡
任人之道要在不疑寧可艱於擇人不可輕任而不信
若無賢不肖一例疑之則人各心闌誰肯辦事今卽飾
言一不才顯者所貴朝廷肯行然後部下振竦官吏畏
服今反為朝廷不信却委別人則飾之使威誰肯信服
飾亦慙見其下今後見事不若不為不獨卽飾一人臣
竊聞諸處多有按察官吏皆為朝廷不行人各嗟慙以
謂任以事權反加沮惑朝廷之意不可諭也伏望聖慈

取邵飾所奏特與施行又令今後按察使奏人如不才老病灼然不疑者不必更委別官示以不信所貴不失任人之道而令臣下盡心取進止

論軍中選將劄子

軍卒中選將亦是一策

臣伏見國家自西鄙用兵累經敗失京師勁卒多在征行禁衛諸軍全然寡少又無將帥以備爪牙方今為國計者但務外憂夷狄專意邊陲不思根本內虛朝廷

勢弱萬一有事無以支吾今軍帥暗懦非其人禁兵驕
情不可用此朝廷自以為患不待臣言而可知也臣亦
歷考前世有國之君多於無事之際恃安忘危備患不
謹使禍起倉卒而至敗亡者有矣然未有於用兵之時
而反忘武備如今日者兵法曰將者民之司命國家安
危之主也今外以李昭亮王克基輩當契丹內以曹瑋
李用和等衛天子如當今之事勢而以民之司命國之
安危繫此數人安得不取笑四夷遭其輕侮臣謂去歲

北敵忽興狂悖今年元昊妄有請求若使朝廷有一二人中材之將叩頭効死奮身請戰誓雪君耻少增國威則戎狄未敢侵陵朝廷未至屈辱奈何自中及外都無一人既無可恃以力爭遂至甘心於自弱夫天下至廣遂無一人者非真無人也但求之不勤不至耳臣伏思自用兵以來朝廷求將之法不過命近臣舉朝士換武官及選試班行方畧等人而已近臣所舉不過俗吏材幹之士班行所選乃是弓馬一夫之勇至於方畧之人

尤為乖濫試中者僅堪借職縣尉參軍齋挽而已於此
求將而欲捍當今之患此所以困天下而取侮夷狄者
也臣不知朝廷以此數事為求將之術果是乎果非乎
以為是則所得何人知其非則盍思改革又不知朝廷
以將為易得乎為難得乎為易得則數歲未見一人知
其難得則當多方用意早思求擇俟其臨患何可得乎
伏望陛下特詔兩府大臣別議求將之法盡去循常之
格以求非常之人苟非不次以用人難弭當今之大患

臣亦嘗有愚見久欲條陳若必講求庶可參用臣伏見唐及五代至乎國朝征伐四方立功行陣其間名將多出軍卒只如西鄙用兵以來武將稍可稱者往往出於軍中臣故謂只於軍中自可求將試畧言求將之法謹條如左

凡求將之法先取近下禁軍至廂軍中年少有力者不拘等級因其技同者每百人團為一隊而教之較其技精而最勇者百人之中必有一人矣得之以為

隊將此一人技勇實能服其百人矣以為百人之將
可也合十隊將而又教之較其技精而最勇者十人
之中必有一人矣得之以為裨將此一人之技勇實
能服其千人矣以為千人之將可也合十裨將而又
教之夫技勇出千人之上而難為勝矣則當擇其有
識見知變通者十人之中必有一人矣得之以為大
將此一人之技勇乃萬人之選而又粗知變通因擇
智謀之佐以輔之以為萬人之將可也幸而有技勇

不足而材識出乎萬人之外者此不世之奇將非常格之所求也臣所謂只於軍中自可求將者此也誠能如此得五七萬兵隨而又得萬人之將五七人下至千人百人之將皆自足然後別立軍名而為階級之制每萬人為一軍以備宿衛有事則行師出征無事則坐威天下比夫以豐衣厚祿養驕惰無用之卒而遞遷次補至於拔帥皆是凡愚暗懦之人得失相萬矣若臣之說果可施行俟成一軍則代舊禁兵萬

人散出之使就食于外新置之兵便制其始稍增舊
給不使太優常役其力不令驕惰比及新兵成立舊
兵出盡則京師減冗費得精兵此之為利又遠矣

右臣所陳只是選勇將訓衛兵之一法耳如捍邊破賊
奇才異畧之人不可謂無伏乞早賜留意精求謹具奏
聞伏候勅旨

論逐路取人劄子

剖析處最痛快可誦

臣伏見近有臣僚上言乞將南省考試舉人各以路分糊名於遂路每十人解一人等事雖已奉聖旨送兩制詳定臣亦有愚見合具敷陳竊以國家取士之制比於前世最號至公蓋累聖留心講求曲盡以謂王者無外天下一家故不問東西南北之人盡聚諸路貢士混合為一而惟材是擇又糊名謄錄而考之使主司莫知為何方之人誰氏之子不得有所憎愛薄厚於其間故議者謂國家科場之制雖未復古法而便於今世其無情

欽定四庫全書

唐宋八大家大鈔
卷三十二

十三

如造化至公如權衡祖宗以來不可易之制也傳曰無
作聰明亂舊章又曰利不百者不變法令言事之臣偶
見一端即議更改此臣所區區欲為陛下守祖宗之法
也臣所謂偶見一端者蓋言事之人但見每次科場東
南進士得多而西北進士得少故欲改法使多取西北
進士爾殊不知天下至廣四方風俗異宜而人性各有
利鈍東南之俗好文故進士多而經學少西北之人尚
質故進士少而經學多所以科場取士東南多取進士

西北多取經學者各因其材性所長而各隨其多少取之今以進士經學合而較之則其數均若必論進士則多少不等此臣所謂偏見之一端其不可者一也國家方以官濫為患取士數必難增若欲多取西北之人則却須多減東南之數今東南州軍進士取解者二三千人處只解二三十人是百人取一人蓋已痛裁抑之矣西北州軍取解至多處不過百人而所解至十餘人是十人取一人比之東南十倍假借之矣若至南省又減

東南而增西北是已裁抑者又裁抑之已假借者又假借之此其不可者二也東南之士於千人中解十人其初選已精矣故至南省所試合格者多西北之士學業不及東南當發解時又十倍優假之蓋其初選已濫矣故至南省所試不合格者多今若一例以十人取一人則東南之人合格而落者多矣西北之人不合格而得者多矣至於他路理不可齊偶有一路合格人多亦限以十一落之偶有一路合格人少亦須充足十一之數

使合落者得合得者落取舍顛倒能否混淆其不可者
三也且朝廷專以較藝取人而使有藝者屈落無藝者
濫得不問繆濫只要諸路數停此其不可者四也且言
事者本欲多取諸路土著之人若此法一行則寄應者
爭趨而往今開封府寄應之弊可驗矣此所謂法出而
姦生其不可者五也今廣南東西路進士例各絕無舉
業諸州但據數解發其人亦自知無藝只來一就省試
而歸冀作攝官爾朝廷以嶺外烟瘴北人不便須藉攝

官亦許其如此今若一例與諸路十人取一人此為繆
濫又非西北之比此其不可者六也凡此六者乃大槩
爾若舊法一壞新議必行弊濫隨生何可勝數故臣以
謂且遵舊制但務擇人推朝廷至公待四方如一惟能
是選人自無言此乃當今可行之法爾若謂士習浮華
當先考行就如新議亦須只考程試安能必取行實之
人議者又謂西北近敵士要牢籠此甚不然之論也使
不逞之人不能為患則已苟可為患則何方無之前世

賊亂之臣起於東南者甚衆其大者如項羽蕭銑之徒是已至如黃巢王仙芝之輩又皆起亂中州者爾不逞之人豈專西北矧貢舉所設本待材賢牢籠不逞當別有術不在科場也惟事久不能無弊有當留意者然不須更改法制止在振舉綱條爾近年以來舉人盛行懷挾排門大譟免冠突入虧損士風傷敗善類此由舉人既多而君子小人雜聚所司力不能制雖朝廷素有禁約條制甚嚴而上下因循不復申舉惟此一事為科場

大患而言事者獨不及之願下有司議革其弊此當今科場之患也臣忝貳宰司預聞國論苟不能為陛下守祖宗之法而言又不足取信於人主則厚顏尸祿豈敢偷安而久處乎故猶此彊言乞賜裁擇

言青苗錢第一劄子

蘇氏兄弟所論次青苗不便處最詳悉而歐公此疏尤似有分割

臣伏見朝廷新制俵散青苗錢以來中外之議皆稱不

便多乞寢罷至今未蒙省察臣以老病昏忘雖不能究
述利害苟有所見其敢不言臣今有起請事件謹具畫
一如後

一臣竊見議者言青苗錢取利於民為非而朝廷深惡
其說至煩聖聽命有司具述本末委曲申諭中外以
朝廷本為惠民之意然告諭之後搢紳之士論議益
多至於田野之民蠢然固不知周官泉府為何物但
見官中放債每錢一百文要二十文利爾是以申告

雖煩而莫能諭也臣亦以謂等是取利不許取三分而許取二分此孟子所謂以五十步笑百步者以臣愚見必欲使天下曉然知取利非朝廷本意則乞除去二分之息但令只納元數本錢如此始是不取利矣蓋二分之息以為所得多耶固不可多取于民所得不多耶則小利又何足顧何必以此上累聖政一臣檢詳元降指揮如災傷及五分已上則夏料青苗錢令于秋料送納秋料於次年夏料送納臣竊謂年

歲豐凶固不可定其間豐年常少而凶歲常多今所降
指揮蓋只言偶然一料災傷爾若連遇三兩料水旱則
青苗錢積壓拖欠數多若纔遇豐熟却須一併催納則
農民永無豐歲矣至於中小熟之年不該得災傷分數
合於本料送納者或人戶無力或頑猾拖延本料尚未
送納了當若令又請次料合依錢數則積壓轉多必難
催索臣今欲乞人戶遇災傷本料未曾送納者及人戶
無力或頑猾拖延不納者並更不支依與次料錢如此

則人戶免積壓拖欠州縣免鞭朴催驅官錢免積久失陷
一臣竊聞議者多以抑配人戶為患所以朝廷屢降指揮
丁寧約束州縣官吏不得抑配百姓然諸路各有提舉
管勾等官往來催促必須盡錢俵散而後止由是言之
朝廷雖指揮州縣不得抑逼百姓請錢而提舉等官又
却催促盡數散俵故提舉等官以不能催促盡數散俵
為失職州縣之吏亦以俵錢不盡為弛慢不才上下不
得不遞相督責者勢使之然各不獲已也由是言之理

難獨責州縣抑配矣以臣愚見欲乞先罷提舉勾管等
官不令催督然後可以責州縣不得抑配其所俵錢取
民情願專委州縣隨多少散之不得須要盡數亦不必
須要闔縣之民戶戶盡請如此則自然無抑配之患矣
右謹具如前臣以衰年昏病不能深議遠慮所見目前
止於如此然而青苗之議久已喧然中外羣臣乞行寢
罷者不可勝數其所陳久遠利害必已詳盡而無遺矣
一日陛下赫然開悟悉採羣議追還新制一切罷之以

便公私天下之幸也若中外所言雖多猶未能感動天聽則見行不便法中有此三事尤繫目下利害如臣畫一所陳伏望聖慈特賜裁擇今取進止

請耕禁地劄子

經國至計與蘇子由所上乞禁邊臣爭界劄子互看

臣昨奉使河東相度沿邊經久利害臣竊見河東之患患在盡禁沿邊之地不許人耕而私糴北界斛斗以為

邊儲其大害有四以臣相度今若募人耕植禁地則去
四大害而有四大利河東地形山險輦運不通邊地既
禁則沿邊乏食每歲仰河東一路賦稅和糴入中和博
斛斗支往沿邊人戶既阻險遠不能輦運遂賈金銀絹
銅錢等物就沿邊貴價私糴北界斛斗北界禁民以粟
馬南入我境其法至死今邊民冒禁私相交易時引爭
鬪輒相斫射萬一興訟遂構事端其引惹之患一也今
吾有地不自耕植而偷糴隣界之物以仰給若敵常歲

豐及緩法不察而米過吾界則尚有可望萬一彼歲不
豐或其與我有隙頓嚴邊界禁約而閉糴不通則我軍
遂至乏食是我師饑飽繫在敵人其患二也代州岢嵐
寧化火山四州軍沿邊地既不耕荒無定主敵人得以
侵占往時代州陽武寨為蘇直等爭界訟久不決卒侵
却二三十里見今寧化軍天地之側杜思榮等又來爭
侵經年未決岢嵐軍爭掘界壕賴米光濬多方力拒而
定是自空其地引惹北人歲歲爭界其害三也禁膏腴

之地不耕而困民之力以遠輸其害四也臣謂禁地若耕則一二歲間北界斛斗可以不糴則邊民無爭糴引惹之害我軍無饑飽在敵之害沿邊地有定主無爭界之害邊州自有粟則內地之民無遠輸之害是謂去四大害而有四大利今四州軍地可二三萬頃若盡耕之則其利歲可得三五百萬石伏望聖慈特下兩府商議如可施行則召募耕種稅入之法各有事目容臣續具條陳取進止



唐宋八大家文鈔卷三十二